

A woman with dark braided hair, wearing a red dress with a yellow geometric pattern on the chest and large gold earrings, stands in a field of tall golden grass. She is holding a large, rustic clay pot. The background is a clear blue sky with light clouds.

MOSADI

a le Sedibeng

MAPULA MARTHA MALATJI
Diswantšho ka Jonanda Kannemeyer

MOSADI A LE SEDIBENG

© 2023 One Heart
Kgatišo ya pele 2023
E gatišitšwe Afrika Borwa
ISBN: 9781776475551

Puku e ka phatlalatšwa ntle le tefo, efela go kgahlanong le molao go e rekiša. Puku e humanwa go www.oneheartforkids.co.za.

Ka tumelelo ya bagatiši, puku e ka abelanwa ka go gatišwa, go fotokhophiwa goba ka mokgwa wa eletroniki. Puku ga se ya swanela go fetolwa ka mokgwa ofe goba ofe. Go kgopela tumelelo ya go gatiša puku o ka ikgokaganya le bagatiši.

One Heart
17 Pelikaan Street
Stellenbosch, 7600
South Africa
www.oneheartforkids.co.za

Mongwadi: Dr. Mapula Martha Malatji
Mothaladíswantšho: Jonanda Kannemeyer
Morulaganyi: Elizabeth Phala
Motlanyi: Imprint Publishing

Dikanegelo Tša Beibele
TESTAMENTE YA KGALE

JOHANESE 4

MOSADI
a le Sedibeng

Ge Jesu a be a sepela go tloga Judea go ya Galilea, O ile a tla motseng wa Samaria wo o bitšwago Sikara, gomme sediba sa Jakobo se be se le moo. Jesu o be a lapile, ka fao O ile a dula fase kgauswi le sediba.

Mosadi wa Mosamaria a tla go ga meetse, Jesu a re go yena: “Mphe meetse ke nwe.” Ka nako yeo batho ba Bajuda ba be ba sa rate Basamaria, gomme mosadi a re go Jesu: “O Mojuda gomme nna ke Mosamaria. Ke ka baka la eng o ka nkgopela go nwa?”



Jesu a re go yena, "Ge nkabe o tsebile mpho ya Modimo le gore ke mang yo a go kgopelago go nwa, nkabe o mo kgopetše gomme a go fa meetse a go phela."



Mosadi a re "Morena, ga o na selo seo o ka kgago meetse ka sona, gomme sediba se se tlase. Meetse a a phelago o ka a hwetša kae?"

Jesu a fetola a re: "Mang le mang yo a nwago meetse a, o tla nyorwa gape, eupša mang le mang yo a nwago meetse ao ke mo fago ona a ka se tsoge a nyorilwe. Meetse ao ke ba fago ona a tla fetoga sediba sa meetse, a išago bophelong bjo bo sa felego."

Mosadi a re, "Morena, ke kgopela o mphe meetse a gore ke se nyorwe gomme ke se sa tšwela pele ke etla mo sedibeng."

Jesu a re, "Sepela o bitše monna wa gago o boe."

Mosadi a fetola a re: "Ga ke na monna."

Jesu a re go yena: "O nepile ge o re ga o na monna. Se o se boletšego ke therešo."

Mosadi a re: "Ke kgona go bona gore o moporofeta. Barakgolokhukhu ba rena ba be ba rapela thabeng ye, eupša lena Bajuda le re re swanetše go rapela Jerusalema."



Jesu a fetola a re: “Lena Basamaria le rapela tše le sa di tsebego; rena re rapela seo re se tsebago, gobane phološo e tšwa go Bajuda. Eupša nako e a tla gomme bjale e fihlile e ka yona barapedi ba nnete ba tlogo rapela Tate ka Moya le ka nnete, ka gobane ke mohuta wa barapedi bao Modimo a ba nyakago. Ke Moya, mme barapedi ba gagwe ba swanetše go rapela ka Moya le ka therešo.” Mosadi a re: “Ke a tseba gore Mesia o a tla. Ge A etla, O tla re hlaloseša se sengwe le se sengwe.”

Ke moka Jesu a tsebagatša, “Nna, yo a bolelago le wena—Ke nna Yena.”

Ke moka barutiwa ba Jesu ba ile ba boa gomme ba makatšwa ke go mo hwetša a boledišana le mosadi.



Mosadi o ile a tlogela nkgole ya gagwe ya meetse, a boela motseng gomme a re go batho: "Etlang le bone monna yo a mpoditšego tšohle tšeo ke kilego ka di dira. Na yo e ka ba Mesia?" Ka gona batho ba tloga motseng, ba ya go nyaka Jesu.

Bontši bja Basamaria ba be ba dumela go Jesu ka baka la bohlatse bja mosadi. Ge ba fihla go Jesu, ba mo kgopela gore a dule le bona, gomme a dula le bona matšatši a mabedi. Ka baka la mantšu a gagwe, ba bangwe ba bantši ba ile ba ba badumedi.

Batho ba re go mosadi: "Ga re sa dumela ka baka la seo o se boletšego; bjale re kwele ka borena, gomme re a tseba gore monna yo ruri ke Mophološi wa lefase."





Thapelo

Modimo Tate ka leina la Jesu Krete, re rute go se ahlole batho go ya ka semorafe. Re noše meetse a khutšo go tšwa mmušong wa gago.

Dipotšišo

1. Ke bomang ba ba bego ba boledišana sedibeng?
2. Kgopelo ya Jesu ya mathomo e be e le efe? Karabo a fiwa efe?
3. Ke meetse a a bjang a Jesu a a tshepišago?
4. Morago ga gore mosadi a tlogele kgamelo, o ile a ya kae? Goreng?
5. O tseba bjang gore Basamaria ba ile ba thoma go dumela go Jesu?

Dikgomo Tša go Rera

Monna wa sefahlego sa mebala ye mebedi yo a bitšwago Sekgaila o be a na le dikgomo tše senyane. Maina a dikgomo e be e le lerato, lethabo, khutšo, go se fele pelo, botho, toko, potego, boleta, gomme poo e be e bitšwa boitshwaro.

Ka letšatši le lengwe Sekgaila o ile a otlela kariki ya gagwe go ya letamong la lefelong leo, le dikgomo tša gagwe, go yo kga meetse. Ge a fihla, a kgorometša bao ba bego ba tlile go nyaka meetse pele ga gagwe. Batho ba be ba tšhaba Sekgaila, ba makala ge pelo ya gagwe e be e sa swane le maina a dikgomo. Sekgaila o ile a tlatša dikgamelo tša gagwe ka moka ka meetse, ke moka a thoma leeto la gagwe la go ya gae.

Tsela e be e le e telele e bile e ena le melete ye mentši. Ge dikgomo di dutše di goga, maotwana a mane a kariki a ile a wa gomme a phatloga. Sekgaila a bea diatla hlogong gomme a ipotšiša gore o tlo dira eng. O ile a tlogela dikgomo tša gagwe gomme a ya go yo nyaka thušo motseng. Eupša batho ba motseng ba ile ba gana go mo thuša ka ge e be e se monna wa go loka.



Ge Sekgaila a boela tseleng yeo a bego a tlogetše kariki ya gagwe go gona, a hwetša dikgomo tša gagwe di se gona.

Ge Sekgaila a sa le motseng, banna ba bangwe ba be ba feta, ba bona kariki yeo e robegilego, gomme ba tšea dikgomo. Ba ile ba kgoromeletša kariki ka thoko gomme ba tlogela dikgamelo tša meetse. Dikgomo di ile tša nyorwa gomme tša thoma go goeletša Sekgaila.

Banna bao ba utswitšego dikgomo ba be ba ipona ba le molato ka ge ba be ba tseba maina a tšona ka moka. Le ge Sekgaila a be a se na pelo ye botse, ba ile ba lemoga gore ba be ba sa swanela go utswa dikgomo tša gagwe.

Ge Sekgaila a lla ka baka la tahlegelo ya gagwe, magodu a ile a boela kariking le dikgomo gomme a kgopela tshwarelo go Sekgaila. Dikgomo di be di thabile kudu ka ge bjale di be di na le meetse a go nwa. Sekgaila o ile a makatšwa kudu ke ditiro tša magodu, le yena a sokologa.

Magodu a thušitše Sekgaila go lokiša kariki ya gagwe, le bona ka moka ba tsebja bjalo ka banna bao ba abelanago ditaba tše dibotse tša lerato, lethabo, khutšo, go se fele pelo, botho, toko, potego, boleta le boitshwaro, go ba bangwe.



Thapelo

Modimo Papa re kgopela gore o re ntšhe mmušong wa leswiswi. Re iše mmušong wa lesedi re phele gona.

Dipotšišo


1. Dikgomo tša Sekgaila e be e le tše kae ka palo?
2. Bolela maina a tšona ka go latelana.
3. Ke eng se se dirilego gore maotwana a kariki a senyege?
4. Naa o ka rata go rua dikgomo tša go rera? Goreng?
5. Sekgaila o be a swara batho bjang kua letamong?
6. Kgomo e re thuša ka eng mo bophelong?

Mantšu a maswa

Kariki = senamelwa sa magaing

Goeletša = go hlaba mokgoši

Mosadi a le Sedibeng ke ye nngwe ya dipuku tše 20 tše di bontšhago dikanegetlo tše 10 tša Testamente ya kgale le tše 10 tša Testamente ye ntsywa, moo ye nngwe le ye nngwe ya tšona e nago le ditiragalelo-maphelong, di ithekgile ka tša Beibele.



Puku_1



Puku_2



Puku_3



Puku_4



Puku_5




Puku_6



Puku_7




Puku_8




Puku_9




Puku_10




Puku_11




Puku_12



Puku_13



Puku_14




Puku_15



Puku_16




Puku_17



Puku_18



Puku_19



Puku_20

Mosadi a le Sedibeng

Kanegelong ye re gopotšwa gore ka mehla go na le meetse a go kgotsofatša a bophelo ao a elelago go tšwa tempeleng ya Modimo. Meetse a, a bolela therešo ebile a kgona go dira gore ditšhaba di retologele go Modimo.

Dikgomo Tša go Rera

Kanegelong ye, re rutwa go hlokomela leruo le Modimo a re filego lona ka gore le a re thuša. Le mola re tšwile taolong ya Modimo, Yena o re gapela lešakeng la gagwe.



9781776475551

Sepedi